

Takurda-o Bitrus aco

Rem-se ro n-me à:

M-zante 1:1-2

Baks un gwu-o Shir 1:3-12

Ma-to un she'et-de un ba m-kukop 1:13—2:10

Yo yan-dor depe ye nom da-o ur-koob à 2:11—
4:19

Gwugwer-mo ur-hi mo un yan-dor m-senge ne
5:1-11

Ur-buste 5:12-14

Ur-gas us-kon ne

¹ Me, Bitrus, ko-**yan-Tom YesoKiristi**,* genbe ka takurda-o,

Ha-mo un be-de un hun-ne ye Shir daage untun hamat-ne un hono o-dak ye cakre un dak-to o-Pantus, o-Garatiya ne, o-Kapadoki ne, o-Asiya ne komo o-Bitaniya ne à.

² Shir o-Tato, wu dagnu no hun-ne ye un wu, komo Kukt-o muutu no ba **ur-ba'as**. Wu un nom kaane remen no nomoté Yeso **Kiristi** o-dorotte komo wu so'osté no un bu-yo un hyó-mo un wu. Um konog Shir 'ye no m-yar, komo wu sengu no m-'ya un gwugwu-mo ur-hur deen.

Ur-bongon be-de Shir remen ka sakto-o o ya'asu na m-hoog à

* **Bor-o gaan:1 1:1** Wu Shir daagne à.

³ Depete_a ya'as Shir Tato-o Wan-Koyan na Yeso **Kiristi** ur-bongon remen 'won-de un wu ur-gos-de. Wu ya'ag na mat-o pu-o remen ka sakto-o o ya'asu na m-hoog à, bo wu 'yonse Yeso **Kiristi** be-de ut-marimar à.

⁴ Komo wu 'ye no cim-yo un ba m-sabre, yo a wum ko_yo naase á, essusse n-Ton shir.

⁵ Remen sher-m no, Shir a 'er no un beeb-de un wu har no gokste ká gwu-o ro zongse o rwuunte ho-de ur-kom à.

⁶ Un yo ka nom no o-zak deen, ko de nomte, ya o-da hiin noa tuw un swo ur-koob de ut-meger go-us-go à.

⁷ Da-o no senge m-dore Yeso n-me ur-koob à, yo kute hun-ne unze no shereg Yeso gun gun. Hun-ne m-zwo un zinariya n-me o-ra remen ye rwuunte kar kar. Kang-o gaan, koob-ur no ro untun ka ra-o, amba noa rwuun kar kar, komo sher-m no aragte zinariya. Da-o Yeso **Kiristi** muune à, Shir a m-seps no wu 'ye no m-sek deen remen no shereg be-de un wu.

⁸ Ko de nomte no wet Yeso m-hyan á, amba no wu m-was. Ko de notte wu m-hyan m-moka á, komo no shereg be-de un wu. Komo yatt gom-to he m-hoks m-rwor bo no ro o-zak, un zak-o rwuune be-de Shir á.

⁹ Noa ships ka zak-o remen no m-goks un yo no tuute yish un sher-m no à, gwu-o un kukt-o no.

¹⁰ Um conog m-ruru no ma-to ka gwu-o. Yan-rwor un Ma-to Shir ye rworog bo yar-m he m-haan be-ur no à, komo ye hoob ur-bon ne. Ye rwo'og yish komo ye tu yish, ye hyenet cas bo a he no m-gu à.

¹¹ Ye cituru Shir ma-to un ka da-o komo yo kore unze yo rwo'e **Kiristi** m-haan. Kukt-o **Kiristi** o ro n-me un ye, komo o rure ye bo **Kiristi** he m-swo ur-koob ka da-de ne a 'ye wu m-seps mo he m-dond à.

¹² Amba Shir kutute ká **yan-Rwor un Ma-to Shir** ye unze, ye ro no m-nome m-guw ba hi un de un ye á. Ka rem-se ye rwore n-ga à mosse un **Kiristi** ne, m-moka ye ken hun-ne ye rurutu no **Ma-to m-Rerem** un bu-yo un **Kukt-o Shir**, o a tomne rwuun-mo n-Ton un shir à. Ka nip-o o mosse un bo Shir ruru na ne à, o yan-tom ye Shir cone m-byarag à.

M-she'et untun hun-ne ye Shir

¹³ Remen kaane, she'et no zongse no nomot rii-yo ur-bon, no garamse hi un no. Rwo no sakt-o no kap be-de un yar-mo a he no m-'ya da-o Yeso **Kiristi** he m-rwuun à.

¹⁴ Nom no untun yakar-ye o-dorotte. No yage hoog-m no heet no be-de un rem-us yo-se se no rotte ba no un nap á.

¹⁵ Amba bo ká wu agu no ro ba m-kukop à, ma'as no ba m-kukop n-me un koyan yo no m-nom à.

¹⁶ Nom no kaane remen **Mosa** geneg yo Shir zee à: "She'et no ba m-kukop, remen kaane um ro ba m-kukop."[†]

¹⁷ Nom no kaane bo no un aag un Tato-o n-Ton wan-piishe un ko wu ke net-wu ut-ma hond hond un yo wu nome ne à. Dek no hoog-m no untun

[†] **Bor-o gaan:16 1:16** Hyen komo: Rewi 11:44-45; 19:2; 20:7.

hamat-ne un kà hono o-dak o un sekemse-mo un wu un hoge un gyer-o un wu ne.

¹⁸ Remen no nipse unze Shir un rur no remen wu guut no be-de un she'et-de o-hwaa de tat-ne no ye n-ga yoosu no à. Wu un rur no un bu-yo un top-o un zinariya ko azorpa á. Zinariya, azorpa ne, ye ba m-ta á.

¹⁹ Amba Shir un rur no un hyó-m **Kiristi**, ka cayo un ba ur-dakka yo komo ka yo un ba ut-ri'in yo.

²⁰ Shir un dagan **Kiristi** cin ba a ro nomog hono o-dak. Amba Shir rwuunte wu á, se un ka ho-to ur-kom to rem no.

²¹ Un bu-o Yeso no m-sheer be-de Shir, o 'yonse wu be-de m-mar à, komo a ya'uru wu ut-gos un cow-yo m-sekemse. Yo rwo'e no ru'ut sher-m no o-sakto ne be-de Shir.

²² M-moka no muste hi un no ba ut-ri'in un dorotte-o o-nip remen no kumut was-m or no ne. Was no or no ne cin un hur-ur no, komo un hur-ur pus-de ne.

²³ Remen Shir ja'astu no mat-o pu-o komo, ba un go-ye ro m-sabre á, amba ye ro m-she'et har koyan nomot be-de un Ma-to Shir o un hoog à.

²⁴ Ma-to Shir zeeg,

“Hun-ne ro m-'hwo untu ut-gwo,

komo seps-mo un ye ro m-ta untun mok-to o-kot.

Gwo-ut ro m-'hwo kaw, komo mok-ut ro m-zoose.

²⁵ Amba ma-ut Wan-Koyan ro m-es har da-o ba m-ta.”[‡]

Hun-ne ko'otutu no ka **Ma-to m-Rerem** to.

[‡] **Bor-o gaan:25 1:24-25** Hyen komo: Isha 40:6-8 (ut-Girik).

Bor-ûs yoor

¹ Remen kaane, ru no cow-yo ut-yage, no yage raks un hun-ne, komo no cir m-nom o-nip. Yagu no ur-shoob ko no rure ye ken myet-mo un ko to ke gon ma-ut yo-to to.

² Untun yan-yaar pu-ye, hoob no yow-mo o-Kukt mo m-kyukyaw remen mo bo'ossuté no be-de un gwu no.

³ No be'este no nepste Wan-Koyan ro ur-bon ne.*

Kiristi ro ta'ar-de un hoog

⁴ Haan no be-ur Yeso **Kiristi**. Wu ro ta'ar-de un hoog de hun-ne ginme à, amba Shir dak wu komo wu 'ye wu ut-gos deen.

⁵ Komo ya no ro untun ta'ar-to un hoog, to a meete hur-o o-Kukt à. No waragte buug-de un yan-**Cow un kon-se Shir** ye un ba m-kukop, no sekete **seke-to** o-Kukt un bu-o Yeso **Kiristi**. Shir ro m-goks gon ka **seke-to**.

⁶ Ka to ro bo Shir zee un Ma-to un wu à:
 "Gwoť, um shereg ta'ar-de ut-ma o-Urusharima†
 de m-daage un caari-mo m-seps à.
 Kap bo un wu shere un de à
 wua nom m-'e á."‡

⁷ Be-ur no, no ye shere un wu à no nape go un seps-mo Shir ya'u wu à. Amba ka ye gini wu à. Ma-to Shir zeeg,

"Ka ta'ar-de ya-ut-ma jore à,
 de waragte de jiish ko de ke ta'ar-de

* **Bor-ûs yoor:3 2:3** Hyen komo: Bong 34:8. † **Bor-ûs yoor:6 2:6** ut-Girik: o-Sihiyona. ‡ **Bor-ûs yoor:6 2:6** Hyen komo: Isha 28:16 (ut-Girik).

un be-de ut-ma.”§

⁸ Ma-to Shir zeeg,

“Ka ta'ar-de ro m-rwo ur-pukse,

komo de ro ye m-hees remen cikt-de un ye.”*

Ye ro m-pukse remen ye yagute o-dorotte un Ma-to Shir, o yette m-oos un kwukwur-de Shir cooge remen un go un ye à.

⁹ Amba no, Shir un daag no hun-ne kashi, buug-de yan-**Cow un kon-se Shir**, hun-ne ye ba m-kukop, hun-ne ye Shir, remen no nomoté wu ur-bongon. Wu rwuntutu no be-de o-comb, wu hantu no be-de m-cucas.†

¹⁰ N-ga a ro hwoog no be-de un hun-ne ye Shir á, amba m-moka no ro hun-ne ye Shir. N-ga Shir ro m-hoge un 'won-ur no á, amba m-moka Shir o hoge un 'won-ur no.‡

She'et no untun yan-guw-mo Shir

¹¹ No yan-yen-de ne, me no m-kyewes, untun yan-dak-o hor-o, hamat-ne un ka dak-o, gin no ka rem-üş yo-se, se ro ur-gun un hoog-m no à.

¹² Nom no ceen no she'etté ur-bon ne n-me un yan-bor-üş no ye shere o-nip á. Komo ko ye gut no gwot-o un yan-nom un rem-üş yo-se, yea hyenes she'et un no ur-so-de. Yea seps Shir da-o wu he piishe un hono o-dak ut-ma à.

O-dorotte be-de un gwomo-ne

§ **Bor-üş yoor:7 2:7** Hyen komo: Bong 118:22. * **Bor-üş yoor:8 2:8** Hyen komo: Isha 8:14-15. † **Bor-üş yoor:9 2:9** Hyen komo: Rwuu 19:5-6; Isha 43:20 (ut-Girik); Rwuu 19:5; Kara 4:20; 7:6; 14:2; Titu 2:14; Isha 43:21; Isha 9:2. ‡ **Bor-üş yoor:10 2:10** Hyen komo: Hose 2:23.

13 Nom no o-dorotte rem Wan-Koyan un ko o ke **karamsa**-o a ya'ase remen hun-ne, o rwuune be-de un gwomo-to un ko-gwomo à.

14 No nome gwomo-ne o-dorotte, remen gwomo-de o-dak kap Shir o tomnu de, de ye'et yan-koob-de o-dorotte ur-koob komo de bum hun-ne ye nome rii-yo ur-bon à.

15 Remen kaane Shir cone no nom rii-yo ur-bon. Da-o no nome rii-yo ur-bon à, ká raag-ne ye, ye nape **Kiristi** á, yea hoks m-zee ko rii á. Yea hoks m-kum rem-se ur-geeg á.

16 She'et no sasa, amba myet un kaane ne, no hyan no ro sasa no cuw nom un rii yo-yo á. Un suge-de un kaane ma, she'et no untun yan-guw-mo Shir.

17 'Ya no kowan m-sek. Komo no kute hun-ne ye Shir kashi m-was. Gyer no Shir, 'ya no ko-gwomo ut-gos.

Sha-mo un swo-ur koob-ur Kiristi

18 Guw-ne, se no nome yan-hur-ut no o-dorotte no 'ye ye m-sek koyanda. Nom no yo ka, ba be-de un ye ro m-hoge ur-'won un gwugwer-mo ur-hi ne cot á, amba kap un yan-men-ut jaas-to ne.

19 Shir ro gwugwu un no ne da-o no nome rii-yo no nape yo ro hond hond, komo no geeg ut-men un 'mo ur-hur ne un koob-de a no m-'ya ba no un nom rii à.

20 A 'ye no ur-koob remen no nomog rii-yo ba ur-bon, no kum o ka rii á. Amba Shir a 'ye no ur-ho, urege no swoog ur-koob un 'mo ur-hur ne remen no nomog rii-yo ur-bon, remen kaane Shir cone.

21 Un kaane, Shir agu no remen **Kiristi** swoog ur-koob rem no. Wu yaksutu no m-sha, depete no dore bu-yo un wu.

22 "**Kiristi** nom **ur-ba'as** á,

Wu raks hun-ne á."§

23 Ko de nomte a pyapurtu wu à, wu muut ut-reeb á. Komo da-o wu swo ur-koob à, wu waksu ye ut-ma á. Un suge-de un kaane ma, wu shereg be-de Shir, wu nape piish ut-ma à.*

24 **Kiristi** sawag nu-se un **ba'as**-ut na un wur-o un wu. A kamag wu o-**kan** remen a yaguté nom **ur-ba'as** komo a cirit kashi ur-she'et. Shir taas ka hoog-mo mo un **ba'as**-ut no remen hoog-m Yeso.

25 No ro egussute untun yege-ca, amba m-moka no muunte be-de un wan-Ruut-m no un wan-Gut-de un hoog-m no ne.†

Bor-us tet

Campo-ne un ne'a-ne ne

1 Kaane komo ne'a-ne, nomo no campo no ne o-dorotte. Nom no kaane komo urege campo no sher un ma-ut **Kiristi** á. Urege campo no ne hyanag bon-de un ka bu-yo notte ur-she'et à, yea goks **Kiristi**, ba no un nomo ye ut-ma.*

2 Ka campo-ne yea goks Yeso da-o ye hyene she'et-ur so-de un hoog-m no komo no 'ye ye ut-gos.

§ **Bor-us yoor:22 2:22** Hyen komo: Isha 53:9. * **Bor-us yoor:23 2:23** Hyen komo: Isha 53:7. † **Bor-us yoor:25 2:24-25** Hyen komo: Isha 53:5-6 (ut-Girik). * **Bor-us tet:1 3:1** Hyen komo: Apis 5:22; Koro 3:18.

³ Taase no muut ur-hi be-de un ga-se ur-bon ko rii-se un cor-se ur-bon ko gund-to un hwor á.[†]

⁴ Un suge-de un kaane ma, yo depe à, nom no ayewe-to ur-hur un gwugwer-mo ur-hi, komo m-tetemb ne. Gon ka ayewe-to ro m-gos, komo Shir ro to m-hwo un be-ur kashi.

⁵ Un go un kà cow-yo ne'a-ne so-ye ye n-ga ye esse sakto-o un ye be-de Shir à, kume hi un de un ye ut-ayewe. Ye ya'ag campo un ye ne ut-gos.

⁶ Untun **Saratu**, wu nome **Ibrahi** o-dorotte komo wu eeg wu "Rwoog-o re" à. No ma yakar-ye un wu ye, urege no ro m-nom yo depe à komo no yage ko yo ke rii-yo 'ye no o-gyer á.[‡]

⁷ Kaane ma campo-ne, se no nom barag-se ur-bon remen ne'a no ne. Hyen no ye ut-gos ne, remen ye rott ur-beeb bo no ro á. Baks no, Shir ya'ag ne'a-ne yar-mo un wu komo remen ye kumut hoog-m ba m-ta un no ne. Remen kaane, nomu no ne'a no ne bo depe à, taase yo ken yo tuw no yo wen kon-uş no. §

Swor ur-koob remen nom un rii kashi

⁸ Ur-kom, kap she'et no m-sok ne un or no ne ne, ko wu ke wu hyen or un wu rii-yo m-was. No hyen ur-'won un gwugwer-mo ur-hi ne.

⁹ No top men-ut jaas-to un men-ut jaas-to ko ur-reeb n-te ur-reeb á, se de no kone go un ká net-wu o-kwum, remen kááne o Shir egte no wu ye'et no o-kwum.*

¹⁰ Ma-to Shir zeeg,

[†] **Bor-uş tet:3 3:3** Hyen komo: 1Tim 2:9. [‡] **Bor-uş tet:6 3:6**

Hyen komo: Taka 18:12. § **Bor-uş tet:7 3:7** Hyen komo: Apis

5:25; Koro 3:19. * **Bor-uş tet:9 3:9** Hyen komo: Mati 5:43-44.

“Bon net-wu cone m-hoog
 komo wu hyen ho-to ur-bon à,
 Se wu doste rem-de un wu be-de un tep u jaas-o
 komo wu dos nu-o un wu be-de ut-raks.

11 Wu ho'os cow-uş yo-se
 komo wu nom rii-yo ur-bon yo depe à.
 Wu hoob cow-yo un ba ut-ween wu dore yo.

12 Wan-Koyan ro un 'er-de un ye nome kashi un
 rii à,
 komo wu ro m-ke'e un kon-se un ye ut-to.
 Amba wu ro m-tuke un
 yan-men-ut jaas-to o-cin.”†

13 Urege no m-senge no nomot rii-yo ur-bon,
 hun-ne deen a hogusse no m-hoog á.

14 Amba myet un kaane ne, urege no un swo
 ur-koob remen no m-nom un rii-yo ur-bon, Shir
 a 'ye no o-kwum. “Taase no hoge gyer-o un yo ye
 ro m-gyer à, ko komo no was un yo hun-ne zee
 yea nom ne á.”‡

15 Ya no **Kiristi** ur-be un hur-ur no komo wu
 warag Goş-wu wu un hoog-m no. She'et no
 zongse no shest da-o wu ken wu citu no ma-to un
 sakto-o no. Amba nom no kaane un gwugwer-mo
 ur-hi un 'ya m-sek ne.§

16 Amba shas no ye un gwegwer-mo ur-hi, ut-
 gos ne. Nom no rem-se ur-bon bo hur-ut noa
 kaps no á. No jar o-jar no nom rii-yo ba ur-bon
 á, remen ka ye ro no m-tan o-yo yo à, ye hyenet
 m'e remen no ye ma Kiristi ye.

† **Bor-uş tet:12 3:10-12** Hyen komo: Bong 34:12-16 (ut-Girik).

‡ **Bor-uş tet:14 3:14** Hyen komo: Isha 8:12; Mati 5:10. § **Bor-uş tet:15 3:15** Hyen komo: Isha 8:13.

¹⁷ A jiish ur-bon urege con-mo Shir mo no su ur-koob remen no nomog rii-yo depe à otte no su ur-koob remen nom un rii yo-yo à.

¹⁸ **Kiristi** marag o-gaan cot remen **ba'as**-ut na. Wan-ba-**ur-ba'as** marag remen ya-ut-**ba'as**. **Kiristi** nomog yo ka remen wu he no m-heet be-de Shir. A hoog wur-o un wu, amba a muuturu Kukt-o un wu un hoog ne.

¹⁹ Un bu-yo **Kukt-o ShirKiristi** haag wu rworuru Ma-to Shir be-de un kukt-to a ka'e m-guw à.

²⁰ Ye nomute Shir koob-de o-dorotte n-ga n-ga, amba Shir hakkurte un ye ne har un da-o **Nuhu** ro un shaab-o o-hat à, remen Shir a rees hono o-dak m-ho. Hun-ne eer a gu'e un ka hat-o, ye ruwe keez keez un ka ho-mo.*

²¹ Ka ho-mo napa-o un bo a yo'osu no m-ho mo gu no m-moka à. Komo ba dos ut-ri'in to o-wur cot á, amba un waktune ne mo Shir un hur-ur gaan. Shir guug no un bu-yo un ine-m Yeşo **Kiristi**.

²² **Kiristi** ro m-moka n-Ton, so un re-de Shir. **Yan-tom-ye Shir**, ut-gwomo, komo m-'wons ne kap ro un kom-to un wu.

Bor-uş nass

M-sheer be-de Shir

¹ Bo **Kiristi** swo ur-koob un wur-o un wu à, m-moka se no she'et zongse no suut ur-koob bo wu swo de à. Me un zee kaane remen bo un wu swo

* **Bor-uş tet:20 3:20** Hyen komo: Taka 6:1—7:24.

ur-koob un wur-o un wu rem **Kiristi** à, kutute na unze wu 'yarag ka **ba'as-de** wu nome n-ga à.

² Komo kutute na unze ka net-wu waktunte wu yage yo wu ro m-con à, komo wu ro m-con wu nome Shir o-dorotte har un ta-de un hoog-mo un wu.

³ No regussute no naasute o-da deen n-ga, no un hoge un rerem-mo un go un she'et-de hun-ne ro m-she'et à ye nape Shir á. No un hoge un rerem-mo un saw-to m-'e, un yish-ye ye o-yoor ne, un susuur ne, un biki-to m-swo ne, un tuw-to o-ás ne, har un guw-mo us-toog ne.

⁴ M-moka nay no ne ye n-ga hyanag ut-hyat yo hante no yagute gam-o ur-hi un ye ne be-de un nom un rem-uş yo-se à. Remen kááne komo ye ro no ut-reeb.

⁵ Amba yea shes Shir wu ro un piishe un yan-hoog un margan-ne ne ut-ma à.

⁶ Yo yo rwo'e a rurut **Ma-to-m-Rerem** har be-de un ye ro margan-ne m-moka à. Ko de nomte à a piishitu ye ut-ma o-wur untun ko wu ke net-wu, amba m-moka ye ur-she'et un Shir ne un bu-yo un **Kukt-o Shir**.

⁷ Ta-de un ko yo ke rii-yo nomoste yow yow. Remen kaane rwo no ur-hur sak, no garamse hi un no remen no hoksté us-kon.

⁸ Yo jiishe kap à, se no kute or no ne m-was deen, remen was-m ro un bite moor-to ut-**ba'as** to ye nome na à.*

⁹ No barke hun-ne un hur-ut no ba us-hwumug.

¹⁰ Shir ya'ag ko wu ke wan-dor wu m-yar, unze net-wu hoks m-nom yo ken rii-yo remen wu guut

* **Bor-uş nass:8 4:8** Hyen komo: Swoog 10:12.

yan-dor. Shir ya'ag ká yar-mo, remen kaane a mure no ká yar-mo un cow-yo depe à.

¹¹ Urege wu ken wu ro ut-ma, se wu nom untun wu ro m-rwor un Ma-to Shir à. Urege a ya'ag wu ken yar-mo un gu un hun-ne, se wu nom un beeb-de Shir ya'u wu à. Remen un ko yo ke rii-yo Shir a kum ur-bongon rem Yeso **Kiristi**. Me us-kon hun-ne a 'ye Shir m-seps, ut-gwomo ne, ba m-ta. **Amin.**

Swo ur-koob remen dor Yeso

¹² No nay-ne re, taase no hyen ut-hyat un koob-de no m-swo à sa o zee rii pu-yo koru no.

¹³ Amba nom no o-zak, remen no m-swo ur-koob bo **Kiristi** swo de à. Remen noa nom o-zak deen da-o wu he m-muun un seps-mo un wu ne à.

¹⁴ Urege a pyapurtu no remen jin-ur **Kiristi**, no ya-o-kwum-ye, remen Kukt-o m-seps, un o Shir ne ro be-ur no.

¹⁵ Urege no swoog ur-koob, taase de nom remen no hoog net, ko ur-hyow, ko ne yo ken rii yo-yo, ko o-hebe gwuw.

¹⁶ No hoge 'e-mo un swo ur-koob remen no **yan-dor Yeso** á. Un suge-de un kaane ma, bom no Shir remen no ye ma **Kiristi** ye.

¹⁷ Da-o nomoste o Shir hette piishe un hun-ne ye un wu ut-ma à. Komo urege piish un ma-to un wu takante be-ur na. ¿Ya he kor un ye yage nome un ma-to un wu o-dorotte **Ma-to m-Rerem** to Shir?

¹⁸ "Urege kashi un hun-ne possute un yish jaas-ye,

¿ya he m-kor un ye nape Shir ne á un **ya-ur-ba'as** ne?"†

19 Remen kaane, ka ye ro un swo ur-koob remen dorotte-o Shir à, ye senge nom un rii-yo depe à. Komo ye bup Shir kom-ut yoor, remen Shir kashi-wu, wu nome o-dak o-Ton ne.

Bor-us taan

Sek-ye un beeb-ye ne

1 Um conog m-do sek-ye no jaab-o ut-men. Me abre ko-sek, me wu hyane bo **Kiristi** swo ur-koob à. Komo kane co a wong seps-mo un wu un me ne da-o a he na mo m-kute à.

2 Warag no yan-gut-de un kur-o Shir bobsu no à. No nom m-guw untun ya-ur-gut ba ye a gakte á, amba un con-mo ut-men, bo Shir cone no warag à. Nom no kaane ba remen gop-de un hwor á amba un con-mo ut-men.*

3 Ka ye Shir bobsu no à, no sawsu ye us-nu á, amba kute no ye bu-yo ur-bon.

4 Amba da-o Yeso ko-Gwomo-wu un ya-ut-Gut woone noa goks gond-o un seps-mo un wu, oa naase á.

5 No beeb-ye kap, nomo no sek-ye o-dorotte. Ko wu ke wu gweregse or un wu ur-hi. Ma-to Shir zeeg,

“Shir ro m-'yar un yan-nu-mo ur-hi,
 amba wu ro un 'ya ur-ho
 be-de yan-gwegwer-mo ur-hi.”†

† **Bor-us nass:18 4:18** Hyen komo: Swo 11:31 (ut-Girik).

* **Bor-us taan:2 5:2** Hyen komo: Yoha 21:15-17. † **Bor-us taan:5 5:5** Hyen komo: Swo 3:34 (ut-Girik).

⁶ Gweregse no hi un no un kus-o un caari-to ut-kom to ur-beeb to Shir, remen da-o wo wo'e wua 'ye no m-sek un co.‡

⁷ Shir conog no, remen kaane, heetu no wu bo un yo rangsu no à.

⁸ Garamse hi un no, no she'et zongse komo yish hoog-ye. Wan-yage-ut no, **ko-Gwomo-wu un ya-ut-kot**, wu ro ut-dwum untun o-zur o-kot, yo ro ut-tuw un hoob-o un wu yo he m-ho à.

⁹ Kwangu no wu, no she'et ur-beeb ne un sher-m no. No nepste hono o-dak kap or no ne **yan-dor Yeso** ro m-swo ur-koob bo no ro m-swo à.

¹⁰ Shir guug na un ko yo ke bu-yo. Wu daagu na remen wu wongté seps-mo un wu un na ne. Ka seps-mo ro m-she'et ba m-ta. Wua wong-mo un na ne remen a dorute Yeso **Kiristi**. No su ur-koob m-moka, amba ujime o-da hiin, Shir a muut no hond hond, wu sher no komo wu tor no ur-beeb ne.

¹¹ Me us-kon unze Shir a nom ut-gwomo ur-beeb ne har da-o ba m-ta. **Amin.**

Gas-de ur-kom

¹² Un beeb-ur Siras§ or na ko-yan-ess ut-ma à, um genbe no ka takurda-o o-kotton remen um ye'et no beeb-de us-rwun komo um ruru no, unze yo ka yar-mo Shir mo. Remen kaane sher no m-'wons ne be-de un ka yar-mo.*

¹³ Yan-dor Wan-Koyan un dak-o o-**Babira** ye a daage mosse un no ne à ro no m-gas. Kaane ma

‡ **Bor-üş taan:6 5:6** Hyen komo: Mati 23:12; Ruka 14:11; 18:14.

§ **Bor-üş taan:12 5:12** ut-Girik: Sirabanus. * **Bor-üş taan:12 5:12** Hyen komo: Seng 15:22,40.

wà re Markus n-me_ ụn **Kiristi**, ro_ no_ m-tombe_ ụn gas-de_ ụn wu.[†]

¹⁴ Gas no_ or_ na ne_ ụn gamat-de m-was. Me_ ụs-ko_ Shir 'ye ko wu_ ke wu_ ro_ be-ur_ no_ à gwugwu- mo_ ur-hur, ye_ ro_ n-me_ ụn **Kiristi** à.

[†] **Bor-us taan:13 5:13** Hyen komo: Seng 12:12,25; 13:13; 15:37-39; Koro 4:10; Pmon 24.

ut-Hun

The New Testament in the ut-Hun language of Nigeria

copyright © 2017 Wycliffe Bible Translators, Inc.

Language: ut-Hun

Contributor: WBT Central Zone

All rights reserved.

2025-07-09

PDF generated using Haiola and XeLaTeX on 26 Jul 2025 from source files
dated 9 Jul 2025

c0c13181-081b-50cb-89bb-9a36796100b2